

CNS8038

U GB 27-08 00171 BH789

aab

Mahathir - Jepun (EMBARGO: Untuk Siaran Selepas 10.30 malam ini)
MALAYSIA HARAP JEPUN DAPAT LIHAT FAEDAH-FAEDAH EAEC

KUALA LUMPUR, 27 Ogos (Bernama) -- Perdana Menteri Datuk Seri Dr Mahathir Mohamad berharap Jepun dapat melihat faedah-faedah Perundingan Ekonomi Asia Timur (EAEC).

"Kami berharap agar Jepun dengan kebijaksanaannya dan berpandangan jauh dapat melihat faedah-faedah EAEC ini," katanya pada majlis Jamuan Malam meraikan Perdana Menteri Jepun, Tomiichi Murayama di kediamannya Sri Perdana, di sini.

Dr Mahathir berkata sebagai sebuah negara yang berada di Asia Timur, penyertaan Jepun di dalam EAEC akan dapat memberi sumbangan ke arah pembangunan ekonomi serantau dengan lebih dinamik.

"Kita sedang melihat kemunculan kawasan-kawasan serantau dengan tiga kawasan menguasai ekonomi dunia iaitu Kesatuan Eropah, Kawasan Bebas Cukai Amerika Utara (NAFTA) dan negara-negara di Asia Timur termasuk Asean.

"Dalam usaha untuk menghalang arah aliran munculnya kumpulan-kumpulan eksklusif, kami di dalam Asean telah mencadangkan konsep EAEC yang menitikberatkan keterbukaan rantau ini dan sistem perdagangan pelbagai hala," katanya. -- Lagi.

▼27/08/19-32MST

U GB 27-08 00152 BH790

aab

Mahathir - Jepun 2 Kuala Lumpur (Embargo)

Murayama yang tiba di sini semalam, adalah dalam rangka lawatan tiga hari ke negara ini. Beliau dalam rangka lawatan ke empat buah negara Asia Tenggara iaitu Filipina, Vietnam, Malaysia dan akan ke Singapura pagi esok.

Dr Mahathir juga berkata hubungan erat kedua-dua negara telah berjaya mempertingkatkan lagi perdagangan serta pelaburan Jepun di Malaysia, menjadikannya pelaburan asing yang terbesar.

Rakyat Malaysia, katanya, sekarang bersedia untuk mendapatkan faedah secara langsung daripada kehadiran pelaburan Jepun di negara ini, khususnya daripada segi pemindahan teknologi, latihan pengurusan dan kepakaran teknikal.

"Selepas bertahun-tahun bekerjasama, Malaysia kini mahu rakan kongsi ekonomi yang sebenar dengan Jepun dengan faedah-faedah yang diperolehi dikongsi sama rata," katanya.

Mengenai aspirasi Kerajaan Jepun untuk memainkan peranan yang lebih aktif di dalam masyarakat antarabangsa sebagai negara yang cintakan perdamaian, Malaysia mengalu-alukannya, kata Dr Mahathir. -- Lagi.

▼27/08/19-37MST

U GB 27-08 00163 BH791

aab

Mahathir - Jepun 3 Kuala Lumpur (Embargo)

"Sebagai sebuah negara membangun kami sentiasa menekankan pentingnya pembangunan sosio-ekonomi berbanding dengan pakatan politik dan ketenteraan sebagai asas untuk mewujudkan keamanan dan keselamatan di rantau ini," katanya.

Malaysia, katanya, percaya bahawa Jepun sebagai satu daripada kuasa ekonomi yang utama, harus memainkan peranan yang lebih besar dalam menjaga keamanan dan keselamatan di dalam sistem Pertubuhan Bangsa-Bangsa Bersatu (PBB) yang lebih baik.

"Masanya telah tiba untuk melindungi serta menonjolkan masyarakat pelbagai budaya dan berbilang bangsa di seluruh dunia dan menentang kebangkitan sentimen perkauman yang semakin merebak di beberapa bahagian di dunia terutamanya di negara-negara Eropah Barat dan Amerika Utara," katanya.

Dr Mahathir berkata peningkatan jumlah operasi pengaman PBB di serata dunia yang tidak dijangka menunjukkan kemunculan krisis-krisis baru selepas berakhirnya Perang Dingin.

Peningkatan ini telah menyebabkan perbelanjaan dan kos operasi pengaman PBB menjadi semakin besar sehingga PBB tidak lagi mendapat menanggung perbelanjaan itu. -- Lagi.

▼27/08/19-42MST

CNS8047

U GB 27-08 00112 BH792

aab

Mahathir - Jepun 4 (akhir) Kuala Lumpur (Embargo)

Dalam waktu negara-negara penyumbang utama di kalangan OECD (Pertubuhan Kerjasama Ekonomi dan Pembangunan) agak keberatan untuk memberikan sokongan serta bantuan daripada segi sumber manusia dan kewangan di dalam operasi-operasi pengaman PBB yang baru, peranan dan iltizam Jepun dalam hal ini akan membawa makna yang besar, katanya.

Dalam hubungan ini, beliau berkata, Malaysia berharap Jepun tidak akan berhenti daripada memberi sumbangan kewangan untuk operasi-operasi pengaman.

Dr Mahathir berkata sebagai sebuah daripada negara yang berperanan utama dalam arena antarabangsa, Jepun kini mesti bersedia melibatkan diri untuk tugas-tugas pengaman secara langsung. -- Bernama.

JM AZ.

▼27/08/19-45MST